

/վարչական վարույթը վերսկսելու և վարչական տույժ նշանակելու մասին/

«09» մարտի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Հայաստանի Հանրապետության քաղաքացի Արմեն Մերուժանի Անտոնյանի (AV0531410, հասցե՝ ՀՀ, Արարատի մարզ, ՈԿՖ Բանավան, 1Ա շենք, բն. 6) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

2022 թվականի նոյեմբերի 29-ին ՀՀ ՊԵԿ ՀՄՎ Մեղրիի մաքսային կետ-բաժնի աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, ՀՀ քաղաքացի Արմեն Մերուժանի Անտոնյանի կողմից շահագործվող «IVECO» մակնիշի, 37DZ185 պետհամարանիշի բեռնատարը, ինչի արդյունքում, նշված բեռնատարի խցիկի՝ ուղևորի համար նախատեսված հենակի միջից հայտնաբերվել է մաքսային հսկողությունից թաքցված «COBRA» գրառմամբ 16 բլոկ, «NARGIZ» գրառմամբ 16 բլոկ ծխախոտներ:

Փաստի առթիվ 29.11.2022 թվականին ՀՀ ՊԵԿ ՀՄՎ Մեղրիի մաքսային կետ-բաժնի 4-րդ բաժանմունքի մաքսային տեսուչի ժթպ-ի կողմից «Մաքսային կարգավորման մասին» ՀՀ օրենքի 313-րդ հոդվածի հատկանիշներով հարուցվել է վարչական վարույթ:

ՀՀ քաղաքացի Արմեն Մերուժանի Անտոնյանին ՀՀ, Արարատի մարզ, ՈԿՖ Բանավան, 1Ա շենք, բն. 6 հասցեին ուղարկվել է գործի քննության վերաբերյալ ծանուցագիր, սակայն հետադարձ ծրարը փոստային ծառայության կողմից հետ է վերադարձվել «տեղափոխված» նշագրմամբ:

Վարչական վարույթի շրջանակներում մաքսային հսկողությունից թաքցված ծխախոտների շուկայական արժեքները պարզելու նպատակով 01.12.2022 թվականին նշանակվել է ապրանքագիտական փորձաքննություն, որի կատարումը, հիմք ընդունելով ՀՀ ՊԵԿ-ի և ՀՀ ԱՆ «Փորձագիտական կենտրոն» ՊՈԱԿ-ի միջև առկա պայմանագիրը, հանձնարարվել է «Փորձագիտական կենտրոն» ՊՈԱԿ-ին:

Ղեկավարվելով «Վարչարարության հիմունքների և վարչական վարույթի մասին» ՀՀ օրենքի 47-րդ հոդվածի 1-ին մասի բ) ենթակետով և 4-րդ մասով 26.01.2023 թվականին վարչական վարույթը երկարաձգվել է:

Վարչական վարույթի շրջանակներում ՀՀ քաղաքացի Արմեն Մերուժանի Անտոնյանի կողմից մաքսային հսկողությունից թաքցնելու եղանակով ՀՀ մաքսային սահմանով տեղափոխված ապրանքների մաքսային արժեքները, վճարման ենթակա մաքսային վճարների չափերը և ոչ սակագնային կարգավորման միջոցների կիրառելիությունը պարզելու նպատակով՝ թիվ 49 մտից համարի զեկուցագրով հարցում է կատարվել ՀՀ ՊԵԿ Հարավային մաքսատուն-վարչության համապատասխան ստորաբաժանմանը:

ՀՀ ՊԵԿ Հարավային մաքսատուն-վարչության մաքսային գործառնությունների բաժնի թիվ 59 մտից համարի տեղեկանքի համաձայն՝ 2022թ նոյեմբերի 29-ի դրությամբ «COBRA» անվանումով «NANO BLACK» տեսակի 16 բլոկ ծխախոտի մաքսային արժեքը կկազմեր **56000** ՀՀ դրամ, «NARGIZ» անվանումով «NANO» տեսակի 16 բլոկ ծխախոտի մաքսային արժեքը կկազմեր **64000** ՀՀ դրամ:

«ԵՏՄ մաքսային օրենսգրքի» 2-րդ հոդվածի 1-ին մասի 25-րդ ենթակետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով

նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

Վարչական վարույթն օբյեկտիվ և բազմակողմանի իրականացնելու անհրաժեշտությունից ելնելով, ինչպես նաև քաղաքացուն հայտնաբերելու և գործի վարույթի ու քննության մասին ծանուցագիրը հանձնելու նպատակով՝ գրություն է ուղարկվել ՀՀ ՊԵԿ մաքսանենգության դեմ պայքարի վարչություն:

ՀՀ ՊԵԿ մաքսանենգության դեմ պայքարի վարչությունից ի պատասխան գրության հայտնել են, որ ՀՀ քաղաքացի Արմեն Անտոնյանին հնարավոր չի եղել հայտնաբերել:

ՀՀ քաղաքացի Արմեն Մերուժանի Անտոնյանի հաշվառման վայրը պարզելու նպատակով՝ հարցում է կատարվել ՀՀ Ոստիկանության անձնագրային և վիզաների վարչությանը:

Ի պատասխան հարցման ՀՀ Ոստիկանության անձնագրային և վիզաների վարչությունը տրամադրել է տեղեկատվություն առ այն, որ քաղաքացի Արմեն Մերուժանի Անտոնյանի հաշվառման վայրի վերաբերյալ տվյալներ առկա չէ:

Քաղաքացի Արմեն Մերուժանի Անտոնյանի սահմանահատումների պատմությունը ստանալու նպատակով՝ 07.03.2023 թվականին հարցում է կատարվել ՀՀ ՊԵԿ Ներքին անվտանգության վարչությանը:

Ի պատասխան հարցման ՀՀ ՊԵԿ Ներքին անվտանգության վարչությունը տրամադրել է սահմանահատումների վերաբերյալ տեղեկատվություն՝ համաձայն որի քաղաքացի Արմեն Մերուժանի Անտոնյանը 04.03.2023 թվականին ժամը 00:49-ին Ագարակ պետական սահմանի անցման կետով մուտք է գործել ՀՀ:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ «Հայաստանի Հանրապետության պետական սահմանով մաքսային հսկողության ներքո գտնվող ապրանքների տեղափոխումը՝ մաքսային հսկողությունից թաքցնելով՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանք՝ այդ ապրանքների մաքսային արժեքի հիսուն տոկոսի չափով, բայց ոչ պակաս, քան մեկ միլիոն դրամի չափով»:

«Մաքսային կարգավորման մասին» ՀՀ օրենքի 332-րդ հոդվածի համաձայն համաձայն՝ «Մաքսային կանոնների խախտումների վերաբերյալ գործը քննվում է պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ Հայաստանի Հանրապետության օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ:

Մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության պետական սահմաններից դուրս»:

Հիմք ընդունելով և ղեկավարվելով «Մաքսային կարգավորման մասին» ՀՀ օրենքի 313-րդ, 322-րդ, 332-րդ հոդվածներով և 334-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Հայաստանի Հանրապետության քաղաքացի Արմեն Մերուժանի Անտոնյանին «Մաքսային կարգավորման մասին» ՀՀ օրենքի 313-րդ հոդվածով սահմանված մաքսային կանոնների խախտում կատարելու համար ենթարկել վարչական պատասխանատվության՝ տուգանել **1 000 000 ՀՀ դրամ**:

2. Որոշման մասին հայտնել Հայաստանի Հանրապետության քաղաքացի Արմեն Մերուժանի Անտոնյանին:

3. «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից:

4. «Մաքսային կարգավորման մասին» ՀՀ օրենքի 334-րդ հոդվածի 4-րդ մասի համաձայն Վարչական տույժ նշանակելու մասին մաքսային մարմինների որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով որոշումը ուժի մեջ մտնելու օրվանից՝ երկու ամսվա ընթացքում:

Սույն որոշմամբ նշանակված փուլանքի վճարման հաշվեհամարն է. **900005024055՝ 1 000 000 ՀՀ դրամ /մեկ միլիոն դրամ/, նշել 30 կողք:**

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ